



Nósanna Imeachta maidir le hiarratais ar Ardú Céime Acadúil a mheas

An Scéim a bhaineann le Léachtóir Sinsearach/Ollamh Comhlach agus Ollamh le

1. Réamhrá

Is é cuspóir na cáipéise seo treoir bhreise a sholáthar don Choiste Arduithe Céime Acadúla (APC) i dtaca le hiarratais ar ardú céime a mheas. Ba chóir an cháipéis seo a léamh i gcomhar leis an bPolasaí Arduithe Céime Acadúla.

2. Ballraíocht an Choiste

Molfaidh an tUachtarán ballraíocht an Choiste Arduithe Céime Acadúla agus déanfaidh an Chomhairle Acadúil í a fhaomhadh. Foilseofar liosta na n-ainmneacha faofa ar láithreán gréasáin Acmhainní Daonna.

- An tUachtarán Ionaid agus Meabhránaí (Cathaoirleach) (ex officio)
- An Leas-Uachtarán don Taighde (ex officio)
- Beirt (2) Lán-Ollúna ó gach Coláiste (Fear amháin, Bean amháin)¹ as réimsí éagsúla
- Ceathrar (4) Ainmnithe de chuid an Uachtaráin nach mór dóibh a bheith ina Lán-Ollúna (ba cheart go mbeadh cothromaíocht inscne ar an mBord agus go ndéanfaí breithniú chomh maith ar fhairsinge ionadaíocht na ndisciplíní)
- Beirt (2) mheasúnóirí maoirseachta neamhspleácha, duine amháin ó réimse STEM, duine eile ó réimse ABL, a bhfuil taithí shuntasach acu ar arduithe céime i suíomh Ardoideachais (le hathbhreithniú tar éis dhá bhabhta arduithe céime). Ainmneoidh an tUachtarán ceathrar (4) ball seachtrach agus déarfadh na Ceardchumainn cé acu na hainmnithe is fearr leo.

Seachas na baill ex officio agus na baill sheachtracha, is iondúil go mairfidh téarma ballraíochta an APC trí bliana, tréimhse a d'fhéadfaí a athnuachan, i gcásanna eisceachtúla, ar feadh trí bliana eile nuair is gá ó thaobh comhsheasmhachta agus leanúnachais de. Tá ballraíocht an APC faoi réir a hathbhreithnithe ag an Uachtarán, de réir mar is gá.

¹ Ceapfaidh an Chomhairle Acadúil baill an Choláiste. Cuimsíonn 'Lán-Ollamh' Ollamh Bunaithe agus Ollamh Pearsanta araon.

Reáchtálfaidh Cathaoirleach an APC ceardlanna d'iarrthóirí mí amháin nó mar sin roimh an spriocdháta d'iarratais.

Tacóidh Acmhainní Daonna leis an riarachán don Choiste Arduithe Céime Acadúla, agus beidh an Stiúrthóir Acmhainní Daonna nó a (h)ainmní i láthair ag gach cruinniú.

3. Freastal ar Chruinnithe an APC

Tá an Cathaoirleach freagrach as a chinntiú go bhfuil córam ag an gcruinniú, is é sin, go bhfuil ar a laghad deichniúr ball den APC i láthair, agus gur mná iad 40% ar a laghad díobh siúd atá i láthair agus gur fir iad 40%. I gcás nach amhlaidh atá, déanfar an cruinniú a chur siar.

Coinneofar súil ar thinreamh go bliantúil agus, más gá, déanfar moltaí chuig Údarás na hOllscoile chun ballraíocht an APC a athrú.

4. Coimhlint Leasa

Ag tús gach babhta, ní mór do bhaill an APC dearbhú a thabhairt maidir le haon choimhlint leasa iarbhir nó bhraite nó fhéideartha. Déanfaidh an Coiste Arduithe Céime breithniú ar a leithéid de choimhlintí leasa iarbhir nó braite nó fhéideartha mar chuid dá phlé, agus é ag féachaint do [Pholasaí na hOllscoile maidir le Coimhlint Leasa QA413](#), [Polasaí Earcaíochta agus Roghnúcháin QA146](#) agus na Nósanna Imeachta a ghabhann leis, agus féachfaidh sé freisin do na samplaí arna leagan amach i [dTreoirínte Coimhlinte Leasa](#) na scéime.

Dearbhóidh baill an APC aon chaidreamh le hiarrthóir(i) a d'fhéadfaí a mheas mar chaidreamh a chruthaíonn leas pearsanta nó coimhlint iarbhir nó bhraite nó fhéideartha a d'fhéadfadh cur isteach ar a mbreithiúnas neamhchlaonta.

Sa chás go bhfuil iarratas á mheas ó iarrthóir a bhfuil a C(h)eann Scoile ina b(h)all den APC, ní eisiafar an Ceann Scoile ón gcruinniú ach iarrfar air/uirthi a c(h)uid tuairimí ar an iarratas a choinneáil siar go dtí go mbeidh tuairimí gach ball eile den choiste tugtha.

Ní dhéanann baill an APC ionadaíocht ar Choláistí/Scoileanna agus níor cheart go ndéanfaí cásanna ar leith a mholadh. Is é ról an APC a chinntiú go dtugtar breithniú neamhchlaonta, cothrom agus comhsheasmhach ar gach iarratas.

Éileofar ar gach ball den APC aon choimhlint leasa, bíodh an choimhlint sin iarbhir nó braite nó fhéideartha, a dhearbhu go foirmeálta i scríbhinn (go hiondúil i ríomhphost chuig an riarthóir ar liosta na n-iarratasóirí a bheith curtha in iúl dóibh ag tús an bhabhta), agus éileofar ar gach measúnóir seachtrach dearbhú maidir le Coimhlint Leasa a shíniú.

Sa chás go bhfuil coimhlint leasa iarbhír nó bhraite nó fhéideartha ag ball den APC i ngeall ar chaidreamh pearsanta nó eile le hiarrthóir(i), ní mór an choimhlint sin a chur in iúl don Chathaoirleach i scríbhinn tráth eisithe an liosta iarratasóirí agus tráth iarrtha na ndearbhuithe maidir le coimhlint leasa. Féadfaidh an Cathaoirleach dul i gcomhairliúchán mar is gá, agus déanfaidh sé/sí cinneadh maidir le haon choimhlint leasa iarbhír nó bhraite nó fhéideartha arna cur in iúl ag aon pháirtí nó duine.

Ní mór do bhaill an APC aon chás ina bhféadfaidís a bheith ag déanamh cinneadh maidir le duine dá neasteaghlach a sheachaint, le go seachnófaí aon choimhlint leasa iarbhír nó bhraite nó fhéideartha. Sa chás go dtagann na cúinsí sin chun cinn, táthar ag súil go dtarraingeoidh ball an Choiste siar ón measúnú le faomhadh an Chathaoirligh.

D'fhéadfadh ball den APC a bheith cairdiúil le hiarrthóir(i) ar ardú céime, nó caidreamh de chineál eile a bheith acu leo, bíodh an caidreamh sin dearfach nó diúltach. Ní mór, ina leithéid de chúinsí, an choimhlint sin a chur ar shúile an Chathaoirligh i scríbhinn tráth eisithe an liosta iarratasóirí agus tráth iarrtha na ndearbhuithe maidir le coimhlint leasa. Is féidir leis an gCathaoirleach dul i mbun comhairliúcháin mar is gá, agus déanfaidh sé/sí cinneadh.

Má airíonn an ball den APC go bhféadfadh sé a bheith deacair air/uirthi an prionsabal fiúntais a chur i bhfeidhm i ngeall ar an gcaidreamh, nó go bhféadfadh a rannpháirtíocht feidhmiú an phrionsabail fiúntais a chur i mbaol, ní mór an choimhlint iarbhír nó bhraite nó fhéideartha sin a chur ar shúile an Chathaoirligh i scríbhinn tráth eisithe an liosta iarratasóirí agus tráth iarrtha na ndearbhuithe maidir le coimhlint leasa. Is féidir leis an gCathaoirleach dul i mbun comhairliúcháin mar is gá, agus déanfaidh sé/sí cinneadh.

Más amhlaidh go bhfuil leas dílsithe ag ball den APC, de bhrí go bhfuil caidreamh aige/aici le hiarrthóir(i), go n-éireodh leis an iarrthóir sin seachas iarrthóir eile, ní mór an choimhlint seo a chur ar shúile an Chathaoirligh i scríbhinn tráth eisithe an liosta iarratasóirí agus tráth iarrtha na ndearbhuithe maidir le coimhlint leasa. Is féidir leis an gCathaoirleach dul i mbun comhairliúcháin mar is gá, agus déanfaidh sé/sí cinneadh.

Tá dualgas ar Mheasúnóirí Seachtracha chomh maith aon choimhlint leasa a chur in iúl agus iarratas á mheas. Cuirfear an riachtanas sin ar a súile don Mheasúnóir Seachtrach sa chuireadh ón APC agus iarrfar ar mheasúnóirí sonraí a thabhairt faoin mbaint atá acu leis an iarrthóir mar chuid dá measúnú. Seolfar cóip de na treoirlínte maidir le coimhlint leasa chuig na Measúnóirí Seachtracha.

5. Ceisteanna Comhionannais

Tá breithniú ar shaincheisteanna comhionannais ríthábhachtach maidir le hoibriú éifeachtach nós imeachta na hOllscoile i leith ardú céime, ar nós imeachta é sin atá deartha chun comhsheasmhacht agus cothroime a chinntiú i gcinnteoireacht.

Ní féidir leis an gCoiste aon saincheisteanna comhionannais nach bhfuil tagairt shonrach déanta ag an iarrthóir dóibh ina (h)iarratas ar ardú céime a ardú ná a phlé.

Tá an APC tiomanta do neamh-idirdhealú ar na naoi bhforas lena n-áirítear inscne, stádas pósta, stádas teaghlaigh, claonadh gnéis, creideamh, aois, míchumas, cine agus ballraíocht den lucht siúil. Déanfaidh an APC aon saincheisteanna comhionannais a mheas de réir Pholasaithe Comhionannais Deiseanna na hOllscoile.²

Beidh ar gach ball den choiste freastal ar oiliúint comhionannais agus ar oiliúint maidir le claonadh neamh-chomhfhiosach, mar aon le hoiliúint ar aiseolas éifeachtach a thabhairt.

6. Measúnú ar iarratais a bhfuil saoire luaite iontu (seachas Comhaltaí Foirne Páirtaimseartha, Saoire Neamhláithreachta)

Is é aidhm na forála seo aird a dhíriú ar an gcaoi a bhfágfar níos mó ban agus cúramóirí ar lár go staitistiúil i gcritéir roghnúcháin áirithe, agus chun na critéir mheasúnaithe a chur in oiriúint dá réir sin. Ní bheidh ar chumas comhalta foirne a ghlac am saor óna p(h)ost de bharr saoire mháithreachais, saoire uchtaíoch, saoire do thuismitheoirí, saoire bhreiteachta, saoire bhreiteachta a bhaineann le míchumas agus saoire cúramóra an méid céanna aschur a chur ar fáil agus a bheidh comhalta foirne den chineál céanna nár ghlac am saor.

Nuair a luaitear saoire a bhfuil taifead uirthi in iarratas, déanfaidh an Coiste Arduithe Céime Acadúla measúnú ar an aschur oibre i gcomparáid leis an deis oibre, i.e. cuirfear aschur acadúil san áireamh ar bhonn *pro-rata* i gcás comhalta foirne a thóg saoire den chineál sin.

7. Nósanna Imeachta Measúnaithe

7.1. Spriocdhátaí agus Prionsabail Oibre

Breithneoidh an APC iarratais atá curtha faoi bhráid Acmhainní Daonna faoin spriocdháta cuí. Beidh dhá spriocdháta den sórt sin ann in aghaidh na bliana: 16.00 ar an lá deireanach oibre de mhí Feabhra agus 16.00 ar an lá deireanach oibre de mhí Lúnasa.

- Is iondúil go léifidh gach comhalta den APC gach iarratas roimh chruinniú an APC agus go gcuirfidh siad leis an bplé ar gach iarratas.
- Oibreoidh an APC ar bhonn comhaontaithe.
- Mura bhfuil ball den APC i láthair ag an gcruinniú ina ndéantar moladh, dearbhóidh sé/sí a c(h)omhaontú nó a (h)easaontas leis an gcinneadh ag cruinniú an APC ina dhiaidh sin.³

² Tá polasaithe na hOllscoile ina leith seo ar fáil ag:

<https://www.universityofgalway.ie/equalityanddiversity/policies-procedures/>

³ Ní cheanglófar ar bhaill den Choiste ar shaoire shabóideach taighde nó as láthair de bharr cúinsí ar a n-áirítear tinneas etc. a bheith páirteach sa phróiseas cinnteoireachta.

- Is iondúil go mbeidh ar an mball nach mbíonn rannpháirteach tuairisc ar na hiarratais a chur isteach roimh chruinniú an APC.

7.2. Modhanna Oibre – Cás Prima Facie

7.2.1. Roimh an gCruinniú

- Déanfaidh gach ball den APC athbhreithniú roimh an gcruinniú ar gach iarratas i gcoinne chritéir na scéime d'fhonn teacht ar a t(h)uairim féin maidir le cás prima facie a bheith déanta nó gan bheith déanta.⁴
- Ba chóir go ndéanfaidh gach ball den Choiste tuairim a thabhairt i leith gach ceann de na príomh-cheantheidil do gach iarrthóir. Cuirfear na tuairimí seo isteach roimh ré ar an pro-forma cuí de réir an scéimre seo a leanas:
 - 3 = Tá an critéar comhlíonta
 - 2 = D'fhéadfadh sé go bhfuil an critéar comhlíonta
 - 1 = Níl an critéir comhlíonta
- Ní chuirfidh na baill aon eolas eile san áireamh maidir leis an iarratas ná an t-iarratasóir, ná ní iarrfaidh sé/sí eolas breise ó aon duine.
- I gcás eisceachtúil, nuair atá líon na n-iarratas ard, féadfaidh an Cathaoirleach beirt nó níos mó den APC a ainmniú mar phríomhléitheoirí ar fho-thacair na n-iarratas.

7.2.2. Le linn an Chruinnithe

- Roghnóidh an Cathaoirleach ball den APC chun an measúnú ar gach iarratas a threorú, agus tar éis don choiste iomlán breithniú a dhéanamh air, déanfar cinneadh comhchoiteann maidir le cibé acu ar sholáthair nó nár sholáthair an t-iarrthóir dóthain fianaise chun cás prima facie a bhunú.
- Sa chás go gcinneadh an APC go bhfuil cás prima facie léirithe ag iarrthóir, déanfaidh an APC an liosta Measúnóirí Seachtracha atá curtha ar fáil ag an iarrthóir agus, as féin, liosta an Chinn Scoile/an Déin Feidhmiúcháin⁵, a mheas agus tiocfaidh sé ar chomhaontú maidir leo, agus seolfaidh sé comhfhreagras ag tabhairt cuireadh do na measúnóirí measúnú a chur isteach do na hiarrthóirí. Éilítear tuairiscí comhlánaithe na measúnóirí seachtracha mar seo a leanas:
 - Ardú Céime chuig Léachtóir Sinsearach/ Ollamh Comhlach: Dhá thuairisc ó mheasúnóirí seachtracha
 - Ardú céime chuig Ollamh le: Trí thuairisc ó mheasúnóirí seachtracha
- Sa chás go gcinneadh an APC nach bhfuil cás prima facie ann don iarrthóir, iarrfar ar bhall den APC dréacht-tuairisc aiseolais a ullmhú lena breithniú agus lena faomhadh ag an APC. Ba chóir go mbeadh réasúnaíocht shoiléir sa tuairisc seo maidir leis an gcinneadh agus go ndéanfaí moltaí maidir leis na gníomhaíochtaí a d'fhéadfadh an t-

⁴ Beidh cás prima facie ann má tá an chomhthuairim ag an APC, faoi réir an mheasúnaithe riachtanaigh ó shaineolaithe seachtracha, gur dóchúil go mbeidh ardú céime ann bunaithe ar an bhfianaise atá curtha ar fáil faoi na critéir ardaithe céime faoi riachtanais na scéime.

⁵ Ba chóir don Cheann Scoile cuí agus don Déan Feidhmiúcháin an liosta seo a aontú. I gcás easaontais, is ag an Déan a bheidh an cinneadh deiridh.

iarrthóir tabhairt fúthu chun iarratas a bheadh á dhéanamh ina dhiaidh sin aige/aici a neartú.

- Nuair a bheidh gach tuairisc aiseolais aontaithe, cuirfidh an APC liosta na n-iarrthóirí nár bhain cás prima facie amach ar fáil le seoladh chuig an Uachtarán chun go nglacfar leis. Seolfar é seo chuig an Uachtarán an t-am céanna a seolfar an liosta moltaí maidir le hardú céime.

7.3. Tuairiscí na Measúnóirí Seachtracha

7.3.1. Ról an APC

Sa chás gur aontaíodh go gcaithfear measúnóirí seachtracha a lorg, beidh na cúraimí seo a leanas ar bhail an APC:

- Déanfar roinnt iarratas a shannadh dóibh;
- Athbhreithniú a dhéanamh ar liosta na measúnóirí seachtracha a chuir an t-iarrthóir agus an Ceann Scoile/Déan Feidhmiúcháin ar fáil;
- Liosta na measúnóirí seachtracha a chomhaontú.

7.3.2. Ról na hOifige Acmhainní Daonna

- Rachaidh Acmhainní Daonna i dteagmháil le liosta comhaontaithe na Measúnóirí Seachtracha agus lorgóidh siad ainmniúcháin bhreise (más gá) go dtí go mbeidh an líon riachtanach tuairiscí faighte;
- Tabharfar 4 seachtaine do na measúnóirí tuairisc a sholáthar;
- Cuirfear na tuairiscí ar aghaidh chuig an APC lena mbreithniú nuair a bheidh an líon riachtanach tuairiscí ó na measúnóirí seachtracha faighte ag Acmhainní Daonna;
- Ag deireadh an phróisis, is féidir le hiarrthóirí cóipeanna de na tuairiscí ó na Measúnóirí Seachtracha a fháil ach teagmháil a dhéanamh le hOifig Saorála Faisnéise na hOllscoile.

7.4. Modhanna Oibre – I ndiaidh an Mheasúnaithe Sheachtraigh

- Roghnóidh an Cathaoirleach ball den APC chun tús a chur leis an bplé ar mheasúnú gach iarratas mar aon le tuairiscí na measúnóirí seachtracha, i gcoinne chritéir na scéime;
- Tabharfar deis do gach ball den choiste atá i láthair a bheith páirteach sa phlé;
- Sa chás go gcuireann measúnóir coimhlint leasa in iúl ina m(h)easúnú, déanfaidh an APC tuairisc an mheasúnóra a chur as an áireamh agus cuirfear tuairisc bhreise nó tuairiscí breise ar fáil. Sa chás go lorgaíonn an coiste tuairiscí breise ó na measúnóirí, breithneofar an t-iarratas ag an gcéad deis nuair a bheidh na tuairiscí breise ar fáil;
- Cinnfidh an APC ansin an bhfuil dóthain fianaise curtha ar fáil ag an iarrthóir i dtaca le hardú céime go dtí an leibhéal riachtanach, le tacaíocht ó mheasúnú seachtrach.
- Sa chás go moltar iarrthóir d'ardú céime, iarrfar ar bhall den APC dréacht-tuairisc

aiseolais a ullmhú lena breithniú agus lena faomhadh ag an APC ag an gcéad chruinniú eile atá socraithe. Ba chóir go mbeadh réasúnaíocht shoiléir sa tuairisc seo maidir leis an gcinneadh agus, nuair is cuí, cur síos ar aon réimsí ar leith eile.

- I gcás nach moltar iarrthóir d'ardú céime, iarrfar ar bhall den APC dréacht-tuairisc aiseolais a ullmhú lena breithniú agus lena faomhadh ag an APC ag an gcéad chruinniú eile atá socraithe. Ba chóir go mbeadh réasúnaíocht shoiléir sa tuairisc seo maidir leis an gcinneadh agus ba chóir go ndéanfaí cur síos ar na gníomhaíochtaí a d'fhéadfadh an t-iarrthóir a dhéanamh chun a chinntiú go n-éireodh níos fearr le hiarratas a dhéanfar ina dhiaidh sin. Ba chóir go dtabharfadh an t-aiseolas scála ama táscach chun na gníomhaíochtaí sin a bhaint amach.
- Nuair a bheidh na tuairiscí aiseolais uile aontaithe, cuirfidh an APC bail críche ar an liosta moltaí atá le seoladh ar aghaidh chuig an Uachtarán le haghaidh a fhaomhadh.

8. Deireadh an Phróisis

Agus críoch curtha leis an bpróiseas:

- Cuirfear ainmneacha na n-iarrthóirí a bhfuil an APC ag moladh ardú céime a thabhairt dóibh ar aghaidh chuig an Uachtarán chun go nglacfar leo.
- Cuirfidh Acmhainní Daonna ainmneacha na n-iarrthóirí nach bhfuil molta ag an APC d'ardú céime ar aghaidh chuig an Uachtarán chomh maith.
- Cuirfidh Cathaoirleach an Choiste an cinneadh maidir lena n-iarratas in iúl i scríbhinn do na hiarrthóirí agus tabharfar tuairisc aiseolais dóibh ar an gcúis/na cúiseanna leis an gcinneadh sin.
- Ba chóir d'iarrthóir a bhfuil cóipeanna dá t(h)uairisc ó na Measúnóirí Seachtracha de dhíth air/uirthi teagmháil a dhéanamh leis an Oifig Saorála Faisnéise.
- Cuirfear torthaí an phróisis measúnaithe in iúl do Dhéin na gColáistí agus do na Chinn Scoile agus cuirfear cóip de na tuairiscí aiseolais ar fáil dóibh maidir leis na hiarrthóirí óna Scoil/Coláiste.
- Tabharfar deis d'iarrthóirí aiseolas ó bhéal a fháil freisin, de ghnáth laistigh de 30 lá ó thoradh an iarratais a bheith curtha in iúl dóibh. Soláthróidh beirt bhall den APC an t-aiseolas ó bhéal (go hiondúil an ball a dhréachtaíonn aiseolas an iarrthóra agus ball amháin eile den Choiste).
- Tar éis aiseolas ó bhéal a thabhairt, déanfar nóta gairid den chruinniú aiseolais a dhréachtú agus a choinneáil mar thaifead ar an gcruinniú. Seolfar an nóta chuig an iarrthóir le hathbhreithniú agus le comhaontú tar éis an chruinnithe aiseolais ó bhéal.
- Cuirfear in iúl d'Fhoireann Bainistíochta na hOllscoile cé hiad na hiarrthóirí ar éirigh leo mar mhír ghnáthaimh.
- Seolfar liosta de na hiarrthóirí ar éirigh leo ardú céime a fháil ar aghaidh lena gcur ar an taifead ag an gcéad chruinniú eile d'Údarás na hOllscoile agus den Chomhairle Acadúil nuair a bheidh deireadh leis an bpróiseas.
- Féadfar na Measúnóirí Seachtracha a chur ar an eolas faoi thoradh iarratas an iarrthóra ar sholáthair sé/sí measúnú dó/di.
- Is é an dáta a mbeidh éifeacht le harduithe céime d'iarrthóirí a n-éireoidh leo an 1

Aibreán nó an 1 Deireadh Fómhair, ocht mí tar éis spriocdháta na n-iarratas don bhabhta ina ndearnadh an t-iarratas, ar choinníoll go bhfuil gach cead faighte faoin bPolasaí seo.

9. Nótaí agus Taifid

Beifear ag súil go ndéanfaidh gach ball den APC nótaí maidir lena m(h) easúnú ar gach iarratas. Ba chóir go mbeadh nótaí neamhphearsanta, fíorasach agus soiléir maidir leis an tuairim atá á tabhairt. Níor chóir go ndéanfaí comparáid idir iarrthóirí sna nótaí ach ba chóir go ndéanfadh siad tagairt do chritéir na scéime nó ráitis a rinne an t-iarrthóir, an Ceann Scoile, an Déan Feidhmiúcháin, nó na Measúnoirí Seachtracha. Seolfar nótaí aonair chuig an riarthóir Acmhainní Daonna agus coinneofar iad ar feadh 12 mhí ar a laghad. Beidh nótaí agus miontuairiscí ábhartha ar fáil d'iarrthóirí ar iarratas i ndiaidh dheireadh an phróisis, lena n-áirítear aiseolas scríofa agus aiseolas ó bhéal. Soláthraítear tuairiscí ó na measúnoirí seachtracha faoi rún (faoi chuimsiú an chreata a bhaineann leis an reachtaíocht um Shaoráil Faisnéise) agus mar sin coinneoidh an Oifig Acmhainní Daonna iad agus féadfaidh iarrthóirí iarratas a dhéanamh orthu faoi Shaoráil Faisnéise.

10. Rúndacht

Coimeádfaidh gach rannpháirtí rúndacht i rith an phróisis. Beidh an plé ar fad le linn an phróisis measúnaithe agus aon sonraí a ghintear faoi rún ag baill an Choiste Arduithe Céime Acadúla. Ní scaoilfear ainmneacha na n-iarrthóirí a gheobhaidh ardú céime go dtí go mbeidh glactha ag an Uachtarán le moltaí an APC agus go mbeidh na hiarrthóirí curtha ar an eolas dá réir.

11. Iarratais Neamhiomlána

Ní dhéanfaidh an APC iarratais neamhiomlána a chur chun cinn. Sa chás go dtugann an Coiste iarratas neamhiomlán faoi deara, déanfar é seo a chur ar ais chuig an iarratasóir, agus tabharfar cuireadh dó/di aghaidh a thabhairt ar na ceisteanna atá le réiteach agus é a chur isteach arís i mbabhta eile ina dhiaidh sin.

An tUachtarán Ionaid agus Meabhránaí, ag feidhmiú mar Chathaoirleach ar na Coistí Arduithe Céime (APC agus EPPC)
30 Eanáir 2026